

तुबारि संपादकीय
टीम

◆ अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆ इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पहुँ जे इ पत्रिका शुरू किओ सि।

◆ तुबारि एक अवाणिज्यिक पत्रिका भो।

◆ तुबारि पत्रिका कोइ मेहणु, जनजाति, त संस्कृति गल्लि कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆ छपाणे पेहले सोभ आर्टिकल दुई टाई पांगेई मेहणु हरालो असे। इ त खुलि बोक असि कि पेहिल बार पांगवाड़ी लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे हारे संस्करण पुठ ठीक करणे कोशिश कते।

◆ आर्टिकल ना मिल्ल, या घाटि मेहणु के मदद ना मिल्ल त तुबारि पत्रिका कदि बि बंद भुई सकति।

◆ कोइ चिज छपां सि या नेई छपां जे तुबारि संपादकीय टीम पुरा अधिकार असा।

◆ अस किलाड़ केन्द्रीय पुस्तकालय, त बजार राखे ठेके भेइ हरिरामे दुकान अन्तर तुबारि ड्रॉप बॉक्स पुठ बि अपु सजाव ओर आर्टिकलस रखुं जे सुविधा किओ असि।

◆ अस सोभि पांगि मेहणु जे हात जोड़ कई निवेदन कते कि, तुस बि कोइ अछा आर्टिकल, पुराणि या नौई कथा, कहावत, कविता, त नौवे घीत (पांगवाड़ी अन्तर) लिख कइ छपां जे हेंनदे दिण।

तुबारि संपादकीय टीम

☎ 9418431531

☎ 9418429574

☎ 9418329200


☎ 9418411199

☎ 9418411599

व्यापारे तरक्किक कीं करीण

हैं किलाड़ बाजार अन्तर नऊ जुवानी सुआ दुकनी लेई, फिर दुई टइ साले बाद बन्न कई छड़ी। इ आर्टिकल तन्ही सोभी मेहणु जे असा, जे व्यापार कते यअ व्यापार करणे बारे सोचण लगे असे।

आज-कले जुवान व्यापार करणे बारे सोचते, व्यापार सुसर चलाण जे कीं-कीं जानकारी लोती। व्यापार अन्तर सचे कि करुणु मेहणु पता इ न चलता। में व्यापार मेहणु पुठ कीं-कीं असर कता, चलता न चलता, कोठी तकर पुजता त में व्यापार सुसर चलाण जे कीं-कीं करणु ऐन्तु? तसे बारे गाड़े दिमाग जोड़ सोचण ऐन्तु। मउ व्यापार अन्तर की सफल भुण पेहलाइ लिख कइ रखणु ऐन्तु। में व्यापार एक-दुइ साले बाद किं भुन्ता यअ पंज-दस



साले बाद, कीं भुन्ता अपु मन अन्तर सोच कइ कागज पुठ लिखुण ऐन्तु इस जे (वीजन स्टेटमेंट/Vision statement) बोते। मतलब पुरु अपु नजर/ध्यान अन्तर रखुण ऐन्तु। व्यापार शुरू करण केआ पहले तसे बारे पुरी रिसार्च/खोज करण जरूरी असु। पता करण केआ पहले कपले व्यापार शुरू न करण। पता न भोल त व्यापार अन्तर घाटा घेइ घेन्ता। तउ त जरूरी असु कि व्यापार केआ पहले हर जानकारी लोती ताकि जपल घाटा घयाल तिखैइ तुस समहड़ी सकते। व्यापार शुरू करण जे कत रुपेइ जोड़, कत मेहणु के जरूरत भुन्ती त कत लोन कडाहा ऐन्ता, अन्ही सोभी चीजी पुठ ध्यान देण ऐन्ता। अपु व्यापार जोड़ बन्ही कइ बुशण ऐन्तु। व्यापार करणे टेम सुआ मुशिकल ऐन्ती, तिखैइ कदी हार न मनड़ी। मश्किले टेम हिम्मत न हारी। जसे व्यापार खरा चलो असा तस बी सुआ मुशिकल ऐन्ती। व्यापार करण जे हमेशा खरू सोचु।

यक खरा व्यापारी, तसे व्यापार अन्तर कत खर्चा आ, कत कमाई भुई रोजे हिसाब-किताब लिख कइ रखता।

व्यापार अन्तर जे तुं गहाक भुन्ते तन्ही जोड़ खरा वर्ताव करण। समान तोलण अन्तर हेरा-फेरी न करीण। अगर तुस तोलण अन्तर हेरा-फेरी न करियेल त तुं गहाक बी तुसी पुठ विश्वास कते त बधते रहते। "जे तोलण अन्तर हेरा-फेरी कता त भगवान बी तस जे बुरु कता"। सुआ व्यापारी अपु गहाकि जोड़ खरा बर्ताव न कते तउ त तन्के व्यापार सुसर न चलता।

व्यापारे मेहणु हर जरूरते पता करण कि इस टेम हे ईलाके अन्तर कस चीजी ज्यदा जरूरत असी। त तस चीजी व्यापार करण।

व्यापारे मेहणु अपु गिहे खर्चे पैसे त व्यापारे पेसै कदी कठे न करण। हमेशा अपु गिहे खर्चे त व्यापार पेसै बखरे-बखरे रखण ऐन्ते। अपु व्यापार अन्तर सिर्फ अपपु जे तन्खाइ हिसाब जोड़ पेसै रखण त तन्ही रुपेइ अन्तरा अपु गिहे खर्चा चलाण। तउ तस मेहणु व्यापार सुसर चलता त से सुआ कमयाव भोइ घेन्ता।

यक ग्रां यक दर्जी त यक हाथी थिआ। तन्ही दुही अन्तर खरी दोस्ती थी। हाथी दर्जी अपु पीठ पुठ कइ घुमांताथ। दर्जी बी हाथी जोइ सुआ प्यार कताथ। तठी यक तएथ थिआ, हाथी रोज तएथ अन्तर सन्नु करण जे घेन्ताथ, तस बथ दर्जी दुकान थी। हाथी दुकानी भेहइ रूक कइ अपु सुणइ दर्जी दुकानी खिडकी बइ अन्तर कताथ त दर्जी जे सलाम कताथ। दर्जी प्यार जोइ तसे सुणइ सेहलांता फिर तसेधे यक केला देन्ताथ। हाथी केला टइ कइ घेइ घेन्ता, हाथी तएथ अन्तर सन्नु कता फिर वापसी पुठ से दर्जी जे यक फियुड घिन ऐन्ता। फियुड दर्जी धे देन्ता त अपु गी जे घेइ घेन्ता। यक रोजे बोक भो, हाथी सन्नु करण जे घेणे बक्त दर्जी दुकान भेहइ रूका, त तेन अपु सुणइ दर्जी दुकानी खिडकी बइ अन्तर की, दर्जी यक ध्यान जोइ अपु झणे सीण लगो थिआ। दर्जी तेस हाथी जोइ मजाक किआ, तेन हाथी सुणइ अन्तर सनाण पुडाइ छड़ी। हाथी अपु दोस्ते मजाक पुठ सुआ लेहर आई, पर से तठिया चुपचप घेइगा। हाथी तएथ अन्तर सन्नु कियु, पर तिएस तेन अपु दोस्त जे फियुड न आन्तु। बथ से दर्जी दुकान भेहइ रूका त अपु सुणइ दर्जी दुकानी खिडकी बइ अन्तर की। दर्जी सोचु कि हाथी मउजे फियुड आन्तोसु। पर तिएस हाथी अपु सुणइ अन्तर खा त पुओणि आन्तो थियु। हाथी सोब खा त पुओणि दर्जी पुठ फटाइ छऊ। दर्जी हेरता रेहीगा। दुकानी सोब झणे खा त पुओणि बइ अले त कुसतरे भोइगा। तस दर्जी से मजाक सुआ मेहगा पडा।

कुछ खास खबर

- ◆ अप्रैल महीने अन्तर तशिका बाड़ी के यक गाड़ी भयानक ऐक्सिडेंट भुआ तड़िया पता पंगेइ मेहणु पढ़ि बइ ऐण - घेण सुआ डर लगता।
- ◆ मेइ पहले हफ्ते अन्तर रोहतांग पास खुली गओ, लहौए त पंगेइ मेहणु अब कुल्लु मनणि ऐण-घेण सुखतु भोइ


दुइ दुकानदार बोक करण लगो असे.....

बबीता



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

अपपु बुच सुसर विश्वास जोइ बिशेल.....??



एडस मेहणु के जिसम अन्तर कम से कम 7 केआ 10 साल तकर कोइ लक्षण नजर न ऐन्ते। एडस बीमारी इन्सान जोइ यक लिंगि सम्बन्ध बणाणे बोलि कसे बी एडस एइ घेन्ता। कुछ मेहणु इ बोते कि काँडोम सुसर लाल ता एडस बीमारी न लगती। काँडोम सिर्फ 18% सुरक्षा कता। काँडोम सिर्फ लिंगे सुरक्षा कता, ओत-कोत, अडंकोष त छोड़ी सुरक्षा न कता। समस्या असी कि लिंगे ओत-कोत, पेट त जंघी के बीची छोड़ी पुठ झठ बीमारी शचि घेन्ती, जसे बोलि खुरक लगती त खशोरि घेन्तू। एडस किटाणु खशोरिए छोड़ी त खेडे बइ बी इन्साने जिसम अन्तर घेइ घेन्ते। एडस बीमारि जे कोइ ईलाज या टीका नेइ। काँडोम एडस केआ बचणे तरीका न भो, एअ तरीका झूठा असा। एडस बीमारि केआ बचणे सिर्फ यके तरीका असा, से अस अपु ब्याह तकर त ब्याह केआ पता बी यौन परहेज करण। अगर दुहए बियाहे बाडे इन्सान अपपु बुच सुसर विश्वास जोइ बिशेल त यौन सम्बन्धी के करण तन्ही कपले बी एडस न भुन्ता।

FOR PUBLIC SAFETY AND WELFARE THIS ADVERTISEMENT IS SPONSORED BY WYCLIFFE INDIA